



Ca di un moment o sierin la anade cu la **Lotarie di Cjadhan**, ma prime, o vin une vore di plasê di mostrâus **l'ultin lavôr che la nestre Ostarie e à metût impins**. E magari, za che o sin, us contin ancje cualchi alc di plui su la robe.

Scomencin cul dî che nus è capitât di lâ avonde ator pe Basse, tai ultin periodis cuant che ancjemò si podeve lâ ator, e soledut tai paîs tirâts dongje dal **Sportel pe Lenghe Furlane tignût de nestre Super Coghe Fuguline**. E propit in grazie di chest, al è saltât fûr che a Prissinins a vevin fat il Lunari par il 2021 e dentri di chel a jerin sedi lis fotografiis di chei dal **Circul Culturâl Anaxum**, une vore bielis (cun dentri cualchi contecurtâr), sedi una schirie di poesiis, cun dentri ancje chi ches di un poete che nus à di pôc mandât la sô prime conte. Insome... parcè no clamâ a meti adun alc Chei di Contecurte?

E cussì al è stât. O vevin timps une vore curts, l'Ostîr al à scrit i tescj di trê contis fatis sù parsore di trê poesis sielzudis dal Lunari. A son saltadis fûr trê imagjins di une storie maluseriose, però une vore peade al ogjet dal lunari: il flum Stele, ven a stâi Anaxum, come che al dîs l'idronim antigon. **L'Ostîr e la Coghe** a àn tirât dongje il fidât Famei **Checo Tam** e intune domenie bielnone di soreli, insieme cu la clape dai Anaxum e sot la direzion di **Michele Carrara**, e doprant la musiche des **ConFusione** in sotfont o vin metût adun il materiâl. Une vore di robe di fâ, a dî il vêr, e al è stât bravonon te post-produzion Michêl de **Actionstudio Films** a rindi une vore ben sedi lis storiis, sedi lis poesis e soledut lis performance pôc preparadis di noaltris de Ostarie.



Ce altri dî: us podaressin contâ che si va a risi di barufâ cui pescjadôrs che si sustin e che a

cirî di filmâ i claps che a saltin sul pêl de aghe nol è mighe facil. Us podaressin contâ che lis poesiis e lis storiis a son vignudis fûr maluseriosis e lis peraulis de Coghe che a vevin di dâ sperance a son ladis in sie, ma la zornade des ripresis invezit e jere biele e sflandorose e si sin gjoldûts une vore. O podaressin contâus che il nestri Famei al à rivât adore a fâ partecipâ te sô leture ancje un pic e che l'Ostîr al varès propit di lâ a cjatâ un paruchîr, o almancul peâsi in cjavei cuant che al è aiar. O podaressin contâus che il Checo, come une star gotiche e crepuscolâr, si refudave di lei in presince dal soreli e o vin scugnût proviodi a fâlu lâ vie. O pûr che la Coghe e crodeve di vêi ordenât al Ostîr di lavorâ suntune poesie e invezit i veve dite il titul di une altre... Insome, une vore di robis divertentis, **ma ce che al conte al è il prodot finâl.**

**Ae fin dal video o cjatais ducj i riferiments** di cui che al à dât la poie e il jutori par la realizazion dal progjet che o ringracin une vore, soregut par vênus dât la ocasion di fâ alc di vîf, dilunc di chest an bisest... Insome... a nô nus pâr che al sedi vignût ben e o vin gust se lu cjalais e lu sparniçais ator